

დანართი

არასამეწარმეო (არაკომერციული) იურიდიული პირის
„ახალციხის მუნიციპალიტეტის სკოლამდელი აღზრდის დაწესებულება“

წესდება



მუხლი 1. იურიდიული პირის სტატუსი და ადგილსამყოფელი

1. არასამეწარმეო იურიდიული პირი - „ახალციხის მუნიციპალიტეტის სკოლამდელი აღზრდის დაწესებულება“ დაფუძნებულია ახალციხის მუნიციპალიტეტის მიერ, მის. ქ. ახალციხე, მ. კოსტავას ქ. N18, რეგისტრაციის რეკვიზიტები: საიდენტიფიკაციო კოდი: 224101317
2. ა(ა)იპ „ახალციხის მუნიციპალიტეტის სკოლამდელი აღზრდის დაწესებულება“ -ს (შემდგომში -იურიდიული პირი) აქვს დამოუკიდებელი ბალანსი, შტამპი, მრგვალი ბეჭედი, სახაზინო და საბანკო ანგარიშები, იურიდიული პირის სხვა რეკვიზიტები.
3. საქმიანობის სამართლებრივ საფუძველს წარმოადგენს საქართველოს კონსტიტუცია, საქართველოს კანონები, წინამდებარე წესდება და საქართველოს განათლების სამინისტროს სამეცნიერო მეთოდური ცენტრის რეკომენდაციები.
4. ა(ა)იპ „ახალციხის მუნიციპალიტეტის სკოლამდელი აღზრდის დაწესებულება“ საკუთარი სახელით იძენს უფლებებსა და მოვალეობებს, დებს გარიგებებს ფიზიკურ და იურიდიულ პირებთან, შეუძლია გამოვიდეს სასამართლოში მოსარჩელედ, ან მოპასუხედ .
5. ა(ა)იპ „ახალციხის მუნიციპალიტეტის სკოლამდელი აღზრდის დაწესებულება“ -ს იურიდიული მისამართია: ქ. ახალციხე, შ. ახალციხელის ქ. #2.

მუხლი 2. იურიდიული პირის მიზნები და ამოცანები.

1. სკოლამდელი დაწესებულებების (ბაგა-ბაღების) სააღმზრდელო-სასწავლო პროცესების გამართული ფუნქციონირება, კვების ორგანიზება და უზრუნველყოფა;

მუხლი 3. იურიდიული პირის უფლება-მოვალეობანი

1. იურიდიული პირი უფლებამოსილია:

- ა) სკოლამდელი აღზრდის დაწესებულებებში განახორციელოს კონტროლი საინტარული ნორმების დაცვაზე, წყალმომარაგების, ელექტრომომარაგებისა და საკომუნიკაციო სისტემების გამართულ მუშაობაზე.
 - ბ) უზრუნველყოს ახალი სასწავლო წლისათვის და ზამთრის სეზონისთვის შესაბამის სამუშაოთა მომზადების ორგანიზება და კოორდინაცია.
 - გ) მოქმედი კანონმდებლობისა და ამ წესდების საფუძველზე, კომპეტენციის ფარგლებში განკარგოს მასზე რიცხული ქონება და ფინანსური სახსრები.
 - დ) მოამზადოს და ჩაატაროს ტრენინგები, კონფერენციები და სხვა ღონისძიებები;
 - ე) უზრუნველყოს სკოლამდელი აღზრდის დაწესებულების ინფორმირება მათთვის საჭირო საკითხებზე;
 - ვ) მოამზადოს და ახალციხის მუნიციპალიტეტის მერს წარუდგინოს წინადადებები სამსახურის მუშაობის გაუმჯობესების მიზნით;
 - ზ) კომპეტენციის ფარგლებში გააფორმოს ხელშეკრულებები საქართველოს ან საზღვარგარეთის ქვეყნების ფიზიკურ და იურიდიულ პირებთან.
2. იურიდიულ პირს, მხოლოდ ახალციხის მუნიციპალიტეტის მერთან შეთანხმებით შეუძლია განახორციელოს შემდეგი საქმიანობა:
 - ა) სესხის აღება;
 - ბ) ქონების შეძენა, განკარგვა, და საქართველოს სამოქალაქო კოდექსის სხვა ფორმებით გადაცემა, უფლებრივად დატვირთვა.
 - გ) სტრუქტურის, საშტატო განრიგისა და ხელფასის ფონდის განსაზღვრა;

დ) კანონით დადგენილი წესითა და კომპეტენციის ფარგლებში, გეგმის საფუძველზე შესყიდვის განახორციელება;

ე) სხვა გადაწყვეტილებების მიღება, თუ ისინი სცილდება გაერთიანების საქმიანობის სფეროს.

3. იურიდიული პირი ვალდებულია:

ა) წარმართოს საქმიანობა მოქმედი კანონმდებლობის შესაბამისად;

ბ) შეასრულოს მოქმედი კანონმდებლობიდან და დადებული ხელშეკრულებებიდან გამომდინარე ვალდებულებები;

გ) დაიცვას სკოლამდელი აღზრდის დაწესებულებებში დადგენილი ნორმები ყველა სფეროში;

დ) მოქმედი კანონმდებლობის შესაბამისად დაწესდეს მუშაობის ახალი ფორმები სკოლამდელ დაწესებულებებში. გაითვალისწინოს ბაგა-ბაღების პედაგოგ- მასწავლებლების და სხვა პერსონალის ინტერესები, მოთხოვნები და წინადადებები;

ე) დაეხმაროს სკოლამდელ დაწესებულებებს უფლებების დაცვასა და რეალიზაციაში;

მუხლი 4. იურიდიული პირის სტრუქტურა და მართვა

1. იურიდიული პირი შედგება ადმინისტრაციისა და ახალციხის მუნიციპალიტეტის ტერიტორიაზე მოქმედი საბავშვო ბაგა-ბაღებისაგან.

2. იურიდიულ პირს ხელმძღვანელობს დირექტორი, რომელსაც თანამდებობაზე ნიშნავს და ათავისუფლებს ახალციხის მუნიციპალიტეტის მერი.

3. იურიდიული პირის დირექტორი:

ა) საქმეებს უძღვება ერთპიროვნულად, მასვე ეკისრება იურიდიული პირის წარმომადგენლობა და პერსონალურად აგებს პასუხს მისი საქმიანობის სწორად წარმართვაზე;

ბ) ახალციხის მუნიციპალიტეტის მერთან შეთანხმებით ახდენს იურიდიული პირის სტრუქტურისა და საშტატო განრიგის დამტკიცებას.

გ) კანონმდებლობის შესაბამისად განაგებს სამსახურის ფინანსურ და მატერიალურ საშუალებებს, ეკისრება პერსონალური პასუხისმგებლობა იურიდიული პირის სარგებლობაში არსებულ ქონებაზე, ფულადი სახსრების მიზნობრივად ხარჯვაზე.

დ) კანონით დადგენილი წესით ხსნის ანგარიშებს და ახორციელებს კანონით გათვალისწინებულ შესაბამის გადარიცხვას.

ე) წარმართავს შრომით ურთიერთობებს, დებს შრომით ხელშეკრულებებს, იცავს თანამშრომელთა უფლებებს, კანონის ფარგლებში დასაქმებულთა მიმართ იღებს დისციპლინარულ და წამახალისებელ ზომებს.

ვ) კომპეტენციის ფარგლებში გამოსცემს ინდივიდუალურ ადმინისტრაციულ-სამართლებრივ აქტებს, ახორციელებს იურიდიული პირის ფუნქციონირებისა და განვითარებისათვის აუცილებელ კანონმდებლობით ნებადართულ სხვა საქმიანობას.

ზ) იურიდიული პირის წინაშე მდგარი საკითხების გადასაწყვეტად ქმნის დროებით სამუშაო ჯგუფებს, კომისიებს.

თ) შეიმუშავებს და ამტკიცებს იურიდიული პირის შინაგანაწესსა და მის დაქვემდებარებაში არსებული ბაგა-ბაღების წესდებებს;

ი) საქართველოს კანონმდებლობის შესაბამისად, ახორციელებს სხვა საქმიანობას.

მუხლი 5. იურიდიული პირის ქონება

იურიდიული პირის ბალანსზე არსებული ქონება, სხვა ქონებასთან ერთად, გამოიყენება მხოლოდ წესდებით დასახული მიზნებისა და ამოცანების შესასრულებლად.

მუხლი 6. იურიდიული პირის ფინანსური სახსრები

1. იურიდიული პირის ფინანსური სახსრებია:

ა) შესაბამისი ბიუჯეტიდან გამოყოფილი მიზნობრივი სახსრები, რომლებიც გამოიყენება მხოლოდ სამსახურის დებულებით განსაზღვრული მიზნებისა და ამოცანების განსახორციელებლად.

ბ) საქართველოს კანონმდებლობით ნებადართული სხვა შემოსავალი.

მუხლი 7. იურიდიული პირის საქმიანობის ბუღალტრული აღრიცხვა-ანგარიშგება

იურიდიული პირი ვალდებულია საქართველოს კანონმდებლობით დადგენილი წესით აწარმოოს საფინანსო-ეკონომიკური საქმიანობის აღრიცხვა-ანგარიშგება, შეადგინოს ბალანსი და მოთხოვნისთანავე წარუდგინოს დამფუძნებელს.

მუხლი 8. იურიდიული პირის კონტროლი

1. იურიდიული პირის საქმიანობა ექვემდებარება კონტროლს, რაც გულისხმობს მის მიერ განხორციელებული საქმიანობის კანონიერების მიზანშეწონილობის, ეფექტურობისა და საფინანსო-ეკონომიკური საქმიანობის ზედამხედველობას.

2. იურიდიული პირის კონტროლის ახორციელებს ახალციხის მუნიციპალიტეტის მერი, რომელიც უფლებამოსილია პერიოდულად მოითხოვოს კონტროლის განსახორციელებლად საჭირო ინფორმაციისა და მასალების წარმოდგენა.

3. კანონმდებლობით დადგენილი წესით, კონტროლის განმახორციელებელი ორგანო უფლებამოსილია შეაჩეროს ან გააუქმოს გაერთიანების არამართლზომიერი გადაწყვეტილება.

მუხლი 9. იურიდიული პირის რეორგანიზაცია და ლიკვიდაცია

1. არასამეწარმეო (არაკომერციული) იურიდიული პირის რეორგანიზაცია ხორციელდება საქართველოს კანონმდებლობით დადგენილი წესით, დამფუძნებლის გადაწყვეტილებით.

2. არასამეწარმეო (არაკომერციული) იურიდიული პირის ლიკვიდაცია ხორციელდება მიზნის მიღწევის შედეგად, სისხლის სამართლის საქმეზე კანონიერ ძალაში შესული სასამართლოს გამამტყუნებელი განაჩენის საფუძველზე, გაკოტრებისას ან საქართველოს სამოქალაქო კოდექსის 38-ე მუხლის შესაბამისად.

3. ლიკვიდაციის დროს უნდა დასრულდეს მიმდინარე საქმეები, დადგინდეს მოთხოვნები, დარჩენილი ქონება გამოიხატოს ფულად ერთეულში, დაკმაყოფილდნენ კრედიტორები და დარჩენილი ქონება გაუნაწილდეს უფლებამოსილ პირებს.

4. დამფუძნებლის გადაწყვეტილება საზოგადოების ლიკვიდაციის პროცესის დაწყების შესახებ უნდა დარეგისტრირდეს მეწარმეთა და არასამეწარმეო (არაკომერციული) იურიდიული პირების რეესტრში. ლიკვიდაციის პროცესი დაწყებულად ითვლება მისი რეგისტრაციის მომენტიდან.

5. ლიკვიდაციის შედეგად დარჩენილი ქონების მიღებაზე უფლებამოსილ პირებს განსაზღვრვს არასამეწარმეო (არაკომერციული) იურიდიული პირის დამფუძნებელი. არასამეწარმეო (არაკომერციული) იურიდიული პირის ლიკვიდაციისას ქონების გასხვისება შესაძლებელია, თუ:

ა) გასხვისება ხელს უწყობს მის მიერ დასახული მიზნების განხორციელებას;

ბ) ემსახურება საქველმოქმედო მიზნებს;

გ) ქონება გადაეცემა სხვა არასამეწარმეო (არაკომერციულ) იურიდიულ პირს.

6. ლიკვიდაციას ახორციელებს ხელმძღვანელობის უფლებამოსილების მქონე პირი (პირები) ან კანონით დადგენილი წესით დანიშნული ლიკვიდატორი. ლიკვიდატორი პასუხს აგებს, როგორც ხელმძღვანელობისა და წარმომადგენლობითი უფლებამოსილების მქონე პირი.

მუხლი 10. დასკვნითი დებულებები.

1. წესდებაში ცვლილებების/დამატებების შეტანა დაიშვება დამფუძნებლის გადაწყვეტილების შემთხვევაში, რომელიც ძალაში შედის მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციის შემდეგ.
2. წესდების ყველა რეგისტრირებული ცვლილება/დამატება ავტომატურად ხდება მისი განუყოფელი ნაწილი.
3. თუ წესდების ერთი ან რამდენიმე დებულება (მუხლი) დაკარგავს ძალას, ეს არ გამოიწვევს წესდების გაუქმებას.
4. წინამდებარე წესდება ძალაში შედის მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციის შემდეგ.

ახალციხის მუნიციპალიტეტი


ზაზა მელიქიძე

